



**Itilliarsummi ikerasaliortoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Stine Egede, Inuit Ataqtigiit)  
(Siullermeerneqarnera)

Siunnersuut matumuuna sammisarput pissangarnartuuvoq. Siunnersuutip kujataani angallanneq pitsanngorsaavigissavaa, taamaalillunilu najungaqavissut ulluinnarni atugaanut pitsanngorsaqaataassalluni, saniatigullu nunap ilaanut takornariaqarnermut nukittorsaaqataasinnaalluni.

Nunarsuarmi inuungaluarutta suut tamaasa akeqanngiffianni, pingaarnersiuinissamullu pisariaqanngittumi, ikerasaliornissaq aallartiinnassangaluarparput. Nunarsuarmili taama ittumi inuunngilagut.

Politikeritut politikikkullu partiitut qanoq tullerriaarissanerluta nalilersortuaannassavarput. Inuit Ataqtigiit matumuuna siunnersuuteqarnermikkut tullerriaarinermini 110 meter-it missaanik takissuseqartussamik ikerasaliortoqarnissaa salliussimavaat, taassumallu Qaqortup Nanortaliullu akornnganni umiatsiamik angalaneq 15 kilomiiterimik naannerulertinnissaa Kommuuni Kujalliup nalilersimavaa.

Inuit Ataqtigiinniit siunnersuutigisimasap aningaasatigut kingunissai peqqissaanngitsumik saqqummiunneqarsimapput. Misissueqqaarnerit, pilersaaruserneq, sanaartukkanik aqutsineq il. il. katillugit 9. milliuninik akeqartussatut nalilerneqarsimapput. Suliassap naammassinissaa 50 milliuninik 250 milliuninik akornnganni akeqartussatut nalilerneqarsimavoq.

Amingartoqarporli. Naammangilarmi asuli sualuit qanoq akeqarneranik nassuiaaneq. Qanoq akilerneqarnissaanut aamma eqqarsaatersortoqartariaqarpoq.

Qqaasinnguamilluunniit ataasinnguamik Inuit Ataqtigiit pilersaaruserneq taama annertutigisoq qanoq aningaasalersorneqassanersoq, kiallu akilissaneraa eqqaanngilaat. Kommuunip? Namminersornerullutik oqartussat? Aningaasaliisussat namminersortut?

Qanorluunniit siunnersuuteqarsimasoq Itilliarsummi ikerasaliortoqarnissaa qanoq akilerneqassanersoq eqqarsaatigisimaneraa tusarusuppara.

Tutsuiginanngissoraara Inuit Ataqtigiit partii taama angitigisoq taama aningaasartuutaatigisussamik siunnersuuteqarsimammata aningaasalersorneqarnissaanullu siunnersuuteqanngiivillutik.



Siunnersuummi aningaasartuutissaanut nalilersuinerit taama sumiginnagaasimatigisut, siunnersuut Inatsisartuni akuerineqassappat akisussaassuseqannginnerusaaq.

Taamatut oqaaseqarlunga siunnersuut itigartinneqarnissaanut innersuuppara.